

Khuga Sadar Presbytery

Tuithanak Khanglai Pastor Bial, One Day Seminar

Amun : Tangmual Presbyterian Church

Guanggal tu: Upa. Benjamin

Ahun : 12/05/12

Thupi: Sakhua (Religion)

Thumapui: tuni zia seminar nei thei dinga hun pha ei mu saktu Pathian leh zia seminar Thupi pawl mawtak mai guanggal thei dinga ei dawi sak tu Tuithanak Dist. Khanglai te chung in kipak thu ka gen ahi.

1. SAKHUA:

Sakhua ti um zia hin tup leh ngim a nei chiat ah, ahin lah world Christian Council (WCC) makai ten ahi leh chu zia gual ahin agen ua sakhua cheng cheng in atup pen (Goal) chu van gam tun ding ahi pen hi atiu. Mikua le ama sakhua taw ki tuak ah um te chu van gam kai ding ti ahi. Ahin lah I Bible in ei zil til dan ahi leh chu I Lalpa Jesu'n hi ti hin atia. Kei ma ah chia lo chu kua ma Pa kiang'h tung thei puan nau John 14:6.

Zia chu ei ma sakhua ah igin dan a chun (Pa leh Chapa leh Thagau thiangtho) pum khat ahiu ti hih i thugin leh i sakhua na, abul pi pawl ma ma pakhat ahi (Doctrine of Trinity)

2. SAKHUA AH GIN UM

(a) Bible ah imu milopi leh mi minthang mi ngaisang um ma ma Abraham hin khua vak en leu hin, Apa Terah tawh hinkhua nuamtak ah amat zinglai un hi ti hi ahung hi. Apa ahi leh chu milim kisiam kawm hou mi ahin, ahinla ama'n vang a lung gil tak in ala taksang pua. A ngai tua na chu Lalpan ahia phat in Apa tawh ala chen nau 'Ur' gam chu nusia ding in Lalpan a kou ta. Taksa lung lengtak leh kap kawm kawm in Lalpan a tiam piak na gam, gamtiam gam Kanaan gam zuan ding in a pawt dawk tai Gen. 12:1

(b) Abraham hi apa leh a in sung mi te tawh taksa ah aki tuak lo zia u 'Ur' gam hi nusia ahi pua, aman sakhua nalam ah Lalpa tawh aki thu tep nau zia in apa sakhua milim hou na chu anut sia zaw ahi. Zia gual a chun tuni hin ei man le bang te hi ahi em kap kawm kawm ah leh lung ngai tak ah i nusia diu chu?

(c) Aban vak en zawm leu hin, sakhua na ginum takah pangte chu, taksa leh thagau in alaw ting sek ui ti ahi. Lalpan Abraham kianga gam atiam min chu ahi leh atang pin, Kanaan gam ti ahi. Himaleh agam min chu zia gual ahin mu ahi.

1. Bawngnawi leh khuaizu luan na gam (Thug 3:8,17)

2. Beulah gam (Is 62:4)

3. Gamthupi (Dan 8:9)

4. Immanuel gam (Is 8:8)

5. Lalpa gam (Hos 9:3)

6. Gamtiam gam (Heb 11:9)

7. Tang leh guam gam (Deut 11:11)

8. Van gua tui mu na gam (Deut 11:12)

9. Gam thiangtho (Zek 2:12)

10. Lalpa'n aholdaw gam (Deut 11:12)

Eima le I um na idin na apat ahin Lalpan kal khat bek sepding in leh Ama lam nga ding leh Ama ah gin na nga ding in nisin in ei chial zing ahi. Unau kingai tua pha hi tiu ahun lai ahin.

3. KHANGLAI HUN AH SAKHUA MI HI APAWI MAW ZIA

Khanglai i hi lai ah sakhua kimat leh gin um apaw maw zia i hiat thiamthei na din Bible apat vak en leu hin, Babulon lengpa Nebukadnezzar in Jerusalem chu ahung sim a, Lalpan Judai gam ah lengpa Jehoiakim chu akhut in ape tai. Dan. 1:2

(a) Hun chu hung chia zel in lengpa'n Kaldai gam leng innpi sunga lengkhawn bawl ding in mibang zat ahem tak ahun hawl ta, zia na a chun Israel te lak in le tangval mel hawi leh duang hawi nung chang pha ahun hawl ta, zia phat ah chun Israel tangval anuai te sia hi tel daw ahiu:

1. Daniel (Belteshazzar)
2. Hananiah (Sadrak)
3. Mishael (Meshak)
4. Azariah (Abednego)

(b) Nikhat chu lengpa Nebuknezzar in mang lamdang tak khat anei in, a gamsung ah mitvai dawi thiam leh Aisan thiam te akokhawm ah adawt vang in kua man ahil chian thei ta pua ah, zia phat a chun Pathian mi sakhua mi tak mai Danial in ahil chian na chu Pathian hiatna ki khawp pi in ahil chian ta. Zia phat a chun lengpa chun Daniel chu a chawi sangtai Daniel 2:48. Daniel chung a chun lengpa chu aki pak ma ma ziak in Babulon gam vai hawm tu khat in asiam tai.

(c) Ni leh tha te chu Lalpa lemguat gual in a chia jela, lengpa'n ami tel te hun apiak dung jui ah kum thum jaw phat leh lengpa ang ah kilak na ding uh tualai pau ah (Interview) nei ding ti ahin, zia na a chun alaw tin thei na ding ua lengpa annek te ahawi apha chuleh dawn thei kham thei ne zing dawn zing ding in amau le dawi sak ahiu.

(d) Ahin la sakhua mi sadrak, meshak leh Abednego te ahiu leh vang lengpa an kuang chu aki khawppi nuam pua, Pathian muang ngam in anche me mai chu atel uh ahi, leng pa ma ah aki lat diu ahun ahung tun phat ta chun, amua cheng chu alawi dang teu sang sang in le pil na leh hiat na lam in, lesawm in asang zawu, zia kipat chun amau cheng chu tel tin in a um tau, ahi vang in alawi teu muda na chu achung un a um zing hi. Babulon leng pa ahi leh chu milim hou leh biak ngaisang mi ahin, ahin lah lawi cha thum ten vang alunggil tak un a pawm thei puau

(e) Amua chung ah muda na nasatak ahung um phat in lengpa'n thupiak (order) khat ahung nei ta, kua hita leh milim ma ah baww khup leh belo chu meikuanglak ah selut ding a hi ti thuhi. Sadrak Meshak leh Abednego ten vang milim mai ah baww khup ah biak sang in meilak ah pai lut atel zaw tau. Amau cheng chu kan tawm in meilak ah selut ding in a guang gal tau, mei kuang lak ah chun kan tawm san a sep lut tau, mei kuang ahat dan chu asepp lut ah pang mikhat le meisan hul in a kanglum hial ahi (Dan 3:23).

Achunga pawsal hangsan leh sakhua mi diktak itak lat gual un ei mau le I Christian sakhua nau hi din pi in leh pang ngam leu hin bangkim in Lalpan i tak sap I ma maw te chu ahun tak in ei pe ding ahi ti hi muang lel puai tiu. Tulai sakhua mi kahi ki ti ngalah sim lam leh mal lam thigua ahung han dung zui ah ei ma le awn thiak thiak ah I um sek teu hi ngai tua kham tak a ting ahi.

4. EI MA SIAM KAWM SAKHUA

Tualai hi khawvel achang kan tak tawh ki tawn in ei ma dawī dan/ ngai dan mai in le sakhua siam leh zui thei mai ahi. Masang lai ah I lau pen te le eima gam ahung tun hun in ei mau in le ki thalawp tak mai in I la pawm thei ta mai ui. Zia chu ahi leh thil lau um SATANIC SAKHUA ti hi ahi. A bik tak mai in tulai ahin Khanglai te lakin ahat ma ma mai ta. A gam a gam in apung hul hul ta mai hi, a zia chu ahi leh zia sakhua hin nawp chen na adal pua chuleh Nungak Tangval te amau dawī dan chiat ah umphal ahi zia kin mitamtak ten a la lung gul khau ahi. Ahin lah a tawp na chu vang zanthim nuai ah athau mei uh kimutmit piak gual mai hi ding ahiu. Aw Khanglai la Khanglai nawpna te chu Nang ma dawī dan dan in mang in, ahin lah a tawp na chu Lalpan vai hun hawm piak ding ahi ti hi hemil puai tiu Thug. 11:9

5. MUSLIM SAKHUA

- (a) Muslim i ti teu hi ahi leh Bible ah imu Abraham leh Hagar cha Ishmael suan te ahiu, Ishmael hi lungsiat um tak mai ahi. A zia chu nau sen tuisik ahilai apat apan dawī lo ah a la pampai ala hi. Insung ah zauchan sunglai a chan zaw lo gual in aman leh apa gam ah chun sunglai chang zoulo ala hin, alung thim atam zaw chu thasiat na leh gal bawl na ding ah dim ahi. Zia zia ah chun amasuan te hin le gal bawl nawp na lungthim apaw zing uh ahi. Khawvel ah gam chan kang US (Sapkang) I tite na tiang in abuai pi kham uh ating u ahi. Ahin la amau apat ettawn ding khat chu sakhua na lam ahin, migin um ahiu. A zia chu amua hi pungkak pungkak ah Pathian a hou nau ah atou lingkang ah um pei nam te ahiu. Taksa dan in leh lawting lou theilo ahiu. Ama vang Lal Jesu'n kei ma ei taksang lou chu van gam tung thei puan na ati thu chang hi a pawm khak lou zia kin un thagau lam in vang ei mau sakhua aphak zawlou nau ahi
- (b) Ei haw hi lah ki khawpna hun asau pen ah pungkak khat (1 hour) ziang le muang tak ah ki chuthim theilou Mobile git hiat ding taw alut apawt di taw i ki khel met mut ziang sek ua, ahin lah ei malak ale thagau ah hin na diktak nei te chu zia haw a chun a buai ngai pua ahi. Mihiam te mitmu na tiang a le mitchim um chu, Pathian mu in bang tin i um ta diam? Tuni hin I hi na hi suthak kitin Lalgam na I sep thei tawh ah leh I hiat te bek sem le hen, taksa leh thagau ah lawtin na hi mai ding ahi. Lal Jesu hi eima Khristiante a ding in sakhua bulpi pen ahi zia kin a na sem ding in Khanglai thahat lai te hi nisin in ei chial zing ahi.

6. HINDU SAKHUA

- (a) Hindu sakhua ti hi eima ngai a chun ginglo tu te i ti mai sek uh ahi, i chen nau gam INDIA gam mileh sa ihi nau (voter I card) inei nagam ahin, 100.Percent lak ahin ei uh Christian te hi 40.Percent sang a le tamzaw lou ding i hui ua, I gam, gam nuamtak thak la umtak ah cheng te hi thagau lam mit et in vang, la phuak tun gam lung siat um gam hi aw ati gual in lungsiat um tak ahi. Athi hi ngal ah hing min puzing tihi igam ahin atam ahi. Ahin la Hindu te hin hou leh biak ngun tak anei ua, a ngai sang ma ma mai ua, a pathian biak nau le thiangtho leh za um tak in abawl ua, taksa et in vang a pathian biak dan uhi phak zaw ding gual ahi puau. A temple sung u chu pathian inn ti in thiangtho tak in akawi ua, keng taw ziang le abut ngai puau, chuleh nik leh puan sil lehchen na tiang in le fel tak in a ki suthiang sek uh ahi. Amau pathian hing houlo Abraham pa Tera pathian houten

bawn zia gual tuk ah chu a pathian uh a ngaisang ua leh ei haw Khristian Pathian hing hou te hin bang atia tempawt tak ah I sakhua hi isuk buak sek uh adiam? Ti hi ngai tua kham tak a ting ahi

- (b) Etsaknan bang atia Biakinn sung na tiang in le I thil nek ichin zawngsak Talab, Khaini, Raja, Dummuaam leh nekthei hawng muthei ding ah um zing ziang nalai ahi tam? Zia hi sakhua i ngaisan zawlou nau etsak na mit ah muthei chu ahi. Ki ngaitua pha hi tiu. Vak vel et kit leu hin taksa dan in vang Hindu sakhua um te hi phak zaw ding gual ahi puau ah, a leh bang lama chu chang kang jawk na I nei ua amua taksa mit et achun sakhua lam thu ah et la leh jui taka I um nau a um chuam em? Judawn sanek chuleh muam leh chep inle lah ei uh hi I uang zawu ah. Ei uh chen nagam neu cha gam dang mi chang kanglou deu ten le bawn ahiat phak lo uh Manipur gam ahin nisin in ALCOHOL, DRUG tite hi ginglo tu business bawl ten a sum munau lianpen in anei tau ah, kua te hin inek I dawn uh a ahi tadium? Ginglo tu Hindu sakhua houte business bawl na'n bang chan ahem I ki phal ding uh? Gelin I maban ding u chu a thim hilo maw? Dan ah I gen Satanic sakhua chu ei ma lak ah le tunglo theilo chu ahi ta mai ahi, ahinla khanglou theilo gingtu ihi lam ki helo in a chang leh sakhua mi ma ma gual in i kingai sek ua.

Abang chu hi taleh I Christian sakhua na hi tukdet zing ah tunung leh khawpi hawi tak lua ding tute I hilaam uh ki hemil lou in thei tawk in Lal na sem jel hi tiu.

7. SAKHUA NALAM A IDIN MUN KI EN CHIAN HI TIU

Khawvel ahin sakhua ki ti tam tak a um a, ei ma dawid dan ngaidan mai ah sakhua mi hi a um thei a, la phuak tun khawvel pathian tam maleh le van ah I pau khat mai a um hi, piantil neilo bul leh tawp chu ahi (Alpha leh Omega) ala ti gual in kua le dan buting zalen na dan chu phatak ah en ah thuk hat tak ah alei teu venglo ah, a lung thim ua ki them zou te chu amau sakhua chu bangma lo mai ahi. Pathian leh Pa mitmu ah sakhua thiango leh suk buak lo chu zia hi ahi, nauchaga te leh meithai te agen thei lai au kan thak leh khawvel ki suk buak saklo hi ahi Jacob 1:26, 27.

A chungathu i tak lat teu hi i hin khua ah apawi maw na ningkhat beka imat thei na ding un Lalpan mal eizawl piak ta hen.